

商務得以日臻起色現公司律雖頒行未久已有華洋商人陸續到部呈請註冊者則此項章程亟應先爲定妥以資開辦在商人以承領部照爲憑藉獲遵循之準在臣部以各商報名爲斷實施保護之方譬如振裘必提其綱庶此後商務之盈虛消息以及各公司局廠是否遵守商律臣部得以隨時查覈遇事維持臣等謹督飭司員參酌中外情形擬定公司註冊章程一十八條繕具清單恭呈 御覽如蒙 俞允即由臣部刊刻通行各省遵照並咨明外務部照會各國駐京大臣備案一面遴選司員經理其事俾專責成至此項章程擬請先行試辦倘有應行增補更改之處仍當隨時酌訂以期周妥謹 奏奉 旨依議欽此

商部奏勸辦京城商會並推廣上海商會情形摺

竊維商務之盈虛視乎商力之厚薄而要以聯絡商會爲樞紐上年十一月間臣部具奏商會簡明章程一摺奉 旨允准欽遵在案京城爲首善之區臣部有提倡之責自應先行勸辦商會以爲各省之倡惟北地風氣未開倘非開誠布公明白曉諭一經誤會流弊滋多是以臣等先期選派司員訪覓明白事理之商人剴切勸告導其來署由臣等親行接見面爲曉諭俾知舉辦商會實爲聯結團體挽回利權起見嗣據金銀號匯兌莊各業商董稟遵部章設立公所互相聯絡遂由臣部發給憑單俾資遵守又使該商董等輾轉勸勉舉事引伸

刻下茶業綢業布業均已次第做辦漸臻就緒嗣後各行業聲氣相通利弊可期諳悉而一切詞訟細故亦可消弭於無形此臣部勸辦京城商會之情形也至於商務之薈萃必歸口岸而口岸之繁盛首推上海去年十二月間臣等奏請將臣部右參議楊士琦留滬辦理商務推廣商會事宜誠以上海爲商賈總匯之區風氣早開措施較易現據該參議函稱上海紳商公舉浙商候選道嚴信厚粵商浙江候補道徐潤熟悉商情堪勝總董之任擬將原設之商業公所遵照奏定章程設法推廣改爲商務總會擬議章程寄呈覈辦前來臣等查上海所設商業公所係於光緒二十八年由前商務大臣盛宣懷奏准設立刊有商業公所關防辦理年餘商情尙無隔閡現經該參議楊士琦督飭該商董等遵照部章復加推廣閱其所擬章程均尙妥洽因即飭令認真遵辦並飭將舊用關防繳銷由臣部另刊木質關防一顆文曰上海商務總會關防發給應用俾昭信守此外各埠再由臣部咨催各省督撫通飭地方官廣爲勸導謹 奏

商部刷印整頓出口土貨摺

竊近年各國商務日異月新有進無已實萃全國之心思才力胥注意於出口土貨至進口貨物則非其國之所需者莫不多方以抑制之絕不使利權外溢臣等忝膺商政日切勤求